



შპს „საქართველოს მყარი ნარჩენების მართვის კომპანია“

მის: ქ. თბილისი, ა. პოლიტკოვსკაიას 14

ელ. ფოსტა: info@waste.gov.ge

საქართველოს გარემოს დაცვისა და სოფლის მეურნეობის სამინისტრომ განიხილა თქვენი 2022 წლის 8 აპრილის განცხადება (N8507), რომელიც ეხება იმერეთის რეგიონში არასახიფათო ნარჩენების განთავსების ობიექტის მშენებლობა-ექსპლუატაციის სკოპინგის ანგარიშს და გაცნობებთ შემდეგს:

- სკოპინგის ანგარიშის სათაური „ქუთაისის მყარი ნარჩენების ინტეგრირებული მართვის პროექტი“ საჭიროებს კორექტირებას, ვინაიდან დაგეგმილი საქმიანობა ითვალისწინებს - წყალტუბოს მუნიციპალიტეტში, არასახიფათო ნარჩენების განთავსების ობიექტის მოწყობა-ექსპლუატაციას;
- ნარჩენების რაოდენობის პროგნოზის შესახებ ინფორმაცია საჭიროებს დაზუსტებას. კერძოდ, საპროგნოზო მაჩვენებლები უნდა მოიცავდეს 20 წლის განმავლობაში მოსალოდნელი ნარჩენების რაოდენობის გამოთვლა/ანგარიშს და მოცემული უნდა იქნეს მოსალოდნელი ნარჩენების დაზუსტებული რაოდენობა (მაგ: სკოპინგის მითითებულია, როგორც 1 745 000 ტ, ისე 1 740 000 ტ). მათ შორის, დაზუსტებული ინფორმაცია თითოეულ რეგიონში წარმოქმნილი ნარჩენების რაოდენობის შესახებ. ამასთან, ვინაიდან, გზშ-ის ანგარიში წარმოდგენილია გარემოსდაცვითი შეფასების კოდექსის I დანართის მე-17 პუნქტის საფუძველზე, მოცემული უნდა იქნეს დღე-ღამის (24 სთ) განმავლობაში მოსალოდნელი-განსათავსებელი ნარჩენების რაოდენობის შესახებ დაზუსტებული ინფორმაცია;
- მნიშვნელოვანია დაზუსტდეს რეგიონებში ნარჩენების შეგროვების და საპროექტო ობიექტამდე მიწოდების სქემის შესახებ ინფორმაცია. მათ შორის, დაზუსტებას საჭიროებს გადამტვირთი სადგურ(ებ)ის შესახებ (არსებობის შემთხვევაში) ინფორმაცია. ამასთან, სკოპინგის ანგარიშში უნდა აისახოს ნარჩენების მართვის გეგმების შესახებ ინფორმაცია ყველა იმ მუნიციპალიტეტისთვის, რომელსაც მოემსახურება საპროექტო ობიექტი;
- დაზუსტებას საჭიროებს ნარჩენების ტრანსპორტირების, სამომხრად მარშრუტების შესახებ (რუკაზე ჩვენებით) ინფორმაცია. ამასთან, მნიშვნელოვანია გათვალისწინებულ იქნეს დასახლებულ პუნქტ(ებ)ში ნარჩენების გადასაზიდი

სატრანსპორტო საშუალებების გადაადგილების შესაბამისი პირობები, მაგ: დაბალი სიჩქარე, სამოდრაო გზის მორწყვა, დახურული ძარა;

- დაზუსტებას საჭიროებს ინფორმაცია ტექნოლოგიური პროცესის/ციკლის შესახებ, შესაბამისი თანმიმდევრობით - ნარჩენების მიღებიდან მის განთავსებამდე განსახორციელებელი ღონისძიებების აღწერით. მათ შორის, ინფორმაცია ნარჩენების ინსპექტირების ზონის და აღნიშნულ ზონაში გათვალისწინებული ღონისძიებების, შემომავალი ნარჩენების კონტროლის შესახებ;
- დაზუსტებას საჭიროებს - უჯრედ(ებ)იდან გამონაჟონი წყლების მიმღები საპროექტო რეზერვუარები, პროექტის სხვადასხვა ეტაპებზე, რამდენად უზრუნველყოფს წყლების მოსალოდნელი მოცულობის შეკავებას (უჯრედ(ებ)იდან გამონაჟონის სავარაუდო მოცულობის მითითებით);
- დაზუსტებას საჭიროებს ინფორმაცია გამონაჟონი წყლების გაწმენდის მეთოდის და გამწმენდი სისტემის შემადგენელი ელემენტის შესახებ, შესაბამისი პარამეტრებისა და ტექნოლოგიური სქემის მითითებით. ამასთან, მნიშვნელოვანია წარმოდგენილი იქნეს გამონაჟონი წყლების გაწმენდის დროს წარმოქმნილი ლექის მართვის შესახებ ინფორმაცია;
- დასაზუსტებელია ინფორმაცია ნარჩენების გადაფარვისთვის გამოყენებული მასალის, მისი ეფექტურობის და გადაფარვის სიხშირის შესახებ;
- ამტვერების პრევენციის მიზნით - მშრალ ამინდებში, უჯრედების მუშა უბანზე ნარჩენების ზედაპირის დასველების/მორწყვის და აღნიშნული მიზნით გაწმენდილი გამონაჟონი წყლის გამოყენების შესაძლებლობის შესახებ ინფორმაცია საჭიროებს დაზუსტებას;
- სკოპინგის ანგარიშის მიხედვით „ობიექტი მდებარეობს ფრინველების ფრენის არეალიდან 8 კმ-ში“. აღნიშნული ჩანაწერი საჭიროებს დამატებით განმარტებას, მნიშვნელოვანია დაზუსტდეს რა იგულისხმება „ფრინველების ფრენის არეალში“. ამასთან, სკოპინგის ანგარიშში წარმოდგენილი უნდა იქნეს დაზუსტებული ინფორმაცია საპროექტო ობიექტზე ფრინველების მოზიდვის პრევენციის მიზნით გასატარებელი შემარბილებელი ღონისძიებების შესახებ;
- ატმოსფერულ ჰაერზე მოსალოდნელი ზემოქმედების მნიშვნელობის განსაზღვრის მიზნით - დაზუსტებას საჭიროებს ინფორმაცია საპროექტო ობიექტიდან მოსალოდნელი ემისიების რაოდენობრივი, ხარისხობრივი მახასიათებლების შესახებ. ასევე დაზუსტებას საჭიროებს ობიექტიდან სუნის გავრცელების პრევენციის მიზნით განსაზღვრული/განსასაზღვრი კონკრეტული ღონისძიებების შესახებ ინფორმაცია;
- ნარჩენების განთავსების ობიექტზე ხანძრის გაჩენის რისკებისა და მისი მართვის ღონისძიებების შესახებ ინფორმაცია საჭიროებს დაზუსტებას;
- დაზუსტებას საჭიროებს ინფორმაცია საპროექტო ობიექტამდე მისასვლელი გზის, მათ შორის მისასვლელი გზის მოწყობით გარემოზე მოსალოდნელი ზემოქმედების შესახებ. სკოპინგის ანგარიშის მიხედვით მოცემული უნდა იყოს აღნიშნული გზის შესახებ ინფორმაცია, დაზუსტებული პარამეტრებისა და მოწყობის გეგმის მითითებით (Shp ფაილებთან ერთად);

- დაზუსტებას საჭიროებს საპროექტო ეტაპების შესახებ ინფორმაცია, თითოეულ ეტაპის დახასიათება, განსახორციელებელი ღონისძიებების და ვადების მითითებით;
- დაზუსტებას საჭიროებს საპროექტო ტერიტორიაზე ნიადაგის ნაყოფიერი ფენის ან/და გრუნტის მოხსნის-დასაწყობებისა და შემდგომი მართვის ღონისძიებების შესახებ;
- სკოპინგის ანგარიშის მიხედვით „კონცეპტუალური დიზაინის ეტაპზე ტერიტორიაზე ტოპოგრაფიული ან გეოტექნიკური კვლევა არ განხორციელებულა“. საპროექტო ტერიტორიის გარემო პირობებისა და მოსალოდნელი ზემოქმედების სათანადო ანალიზისთვის წარმოდგენილ უნდა იქნეს ტერიტორიის გეოლოგიური და ჰიდროგეოლოგიური მახასიათებლების შესახებ ინფორმაცია. აღნიშნული მნიშვნელოვანია - ვინაიდან საკითხის დაზუსტება შესაძლოა დაკავშირებული იყოს ობიექტის საპროექტო მახასიათებლების (დიზაინის) ცვლილებასთან, რაც თავის მხრივ დაკავშირებული იქნება გარემოზე დამატებით ზემოქმედებასთან;
- დაზუსტებას საჭიროებს მოწყობა-ექსპლუატაციის ეტაპზე ობიექტის წყალმომარაგებისა და წარმოქმნილი სამეურნეო-ფეკალური წყლების მართვის ღონისძიებების შესახებ. მათ შორის, ინფორმაცია ობიექტზე წარმოქმნილი სანიაღვრე წყლების და საბურავების საწმენდ უბანზე წარმოქმნილი წყლების მართვის საკითხების შესახებ;
- დაზუსტებას საჭიროებს ინფორმაცია ქვესადგურის შესახებ. მათ შორის, ინფორმაცია მისი განთავსების ადგილის და პირობების, ქვესადგურის ფიზიკური მახასიათებლების (საპროექტო ძაბვა და შემადგენელი ელემენტები) შესახებ. ასევე ინფორმაცია ქვესადგურის მოწყობა-ექსპლუატაციით გარემოზე მოსალოდნელი ზემოქმედების შეფასების შესახებ;
- დაზუსტებას საჭიროებს ინფორმაცია ბენზინგასამართი სადგურის შესახებ, მათ შორის ნავთობპროდუქტების საცავ(ებ)ის (ტიპი, მოცულობა), განთავსების პირობების და მათი მოწყობა-ექსპლუატაციით მოსალოდნელი ზემოქმედების შესახებ. როგორც თქვენთვის ცნობილია ნავთობპროდუქტის საცავის მოწყობა-ექსპლუატაცია წარმოადგენს გარემოსდაცვითი შეფასების კოდექსის რეგულირების სფეროს;
- საპროექტო ტერიტორიის ფართობი შეადგენს 30 ჰა-ს. დაზუსტებას საჭიროებს საპროექტო ტერიტორიის მიწის დანიშნულების/სტატუსის შესახებ ინფორმაცია. კერძოდ, როგორც თქვენთვის ცნობილია 10 ჰექტარი ან მეტი ფართობის სასოფლო-სამეურნეო დანიშნულების მიწის არასასოფლო-სამეურნეო დანიშნულებით გამოყენება წარმოადგენს გარემოსდაცვითი შეფასების კოდექსის რეგულირების სფეროს;
- დაზუსტებას საჭიროებს სკოპინგის ანგარიშის 6.6 ქვეთავი, სადაც საუბარია ბუნებრივ და სოციალურ გარემოზე ზემოქმედების ანგარიშზე (ESIA) და წარმოსადგენ ინფორმაციაზე. როგორც თქვენთვის ცნობილია სკოპინგის ანგარიშში ასახული უნდა იყოს ინფორმაცია ჩასატარებელი საბაზისო/საძიებო კვლევებისა და გზშ-ის ანგარიშის (EIA) მომზადებისთვის საჭირო მეთოდების შესახებ;
- სკოპინგის ანგარიშის მიხედვით „სავალდებულოა, რომ ბუნებრივ და სოციალურ გარემოზე ზემოქმედების შეფასების საფუძველზე, საქართველოს გარემოს დაცვისა

და სოფლის მეურნეობის სამინისტროს მიერ გაცემულ იქნას გარემოსდაცვითი გადაწყვეტილება”. აღნიშნული ჩანაწერი საჭიროებს დაზუსტებას/დაკორექტირებას;

- სკოპინგის ანგარიში (გვ 18-55) მოიცავს ინფორმაციას (არასახიფათო ნარჩენების განთავსების ობიექტისთვის საერთაშორისო და ეროვნული სტანდარტების შედარებითი ანალიზი), რომლის სკოპინგის ანგარიშში ასახვის მიზნობრიობა საჭიროებს დაზუსტებას. აღნიშნული ინფორმაციის ნაცვლად, წარმოდგენილი უნდა იქნეს ეროვნული კანონმდებლობის (2015 წლის 11 აგვისტოს №421 დადგენილება) მოთხოვნებთან საპროექტო ობიექტის შესაბამისობის ანალიზის შესახებ ინფორმაცია. ამასთან, სკოპინგის ანგარიშში მოცემული ტერმინები და ინფორმაცია სრულად უნდა შეესაბამებოდეს N421 დადგენილებას (ნაგავსაყრელის მოწყობის, ოპერირების, დახურვისა და შემდგომი მოვლის შესახებ“ ტექნიკური რეგლამენტის დამტკიცების თაობაზე).
- დაზუსტებას საჭიროებს თერჯოლის მუნიციპალიტეტში არასახიფათო ნარჩენების ნაგავსაყრელის მშენებლობა-ექსპლუატაციაზე 2018 წლის 24 აპრილს N2-278 ბრძანებით გაცემული გარემოსდაცვითი გადაწყვეტილების სტატუსის შესახებ ინფორმაცია. კერძოდ - ვინაიდან, აღნიშნული გარემოსდაცვითი გადაწყვეტილებით განსაზღვრული საქმიანობა (როგორც სკოპინგის დასკვნის მიღების მიზნით წარმოდგენილი საქმიანობა), ასევე ეხება იმერეთის, რაჭა-ლეჩხუმისა და ქვემო სვანეთის რეგიონებისთვის რეგიონალური ნაგავსაყრელის მოწყობა-ექსპლუატაციას, მიზანშეწონილია სკოპინგის დასკვნის წარმოდგენამდე მოხდეს აღნიშნული გარემოსდაცვითი გადაწყვეტილების სტატუსის დაზუსტება, მათ შორის წარმოდგენილი იქნეს მოთხოვნა გადაწყვეტილების გაუქმების შესახებ.

სამინისტრო სკოპინგის დასკვნის მიღების მიზნით ადმინისტრაციულ წარმოებას დაიწყებს წერილში მითითებული საკითხების გათვალისწინებით გადამუშავებული სკოპინგის ანგარიშის წარმოდგენის შემდგომ. გთხოვთ წერილში მითითებულ საკითხებზე რეაგირების შესახებ ინფორმაცია, განახლებულ სკოპინგის ანგარიშში, ასევე წარმოადგინოთ ცხრილის სახით.

ნინო თანდილაშვილი

მინისტრის მოადგილე

